

Broj: 05-39-610/17  
Mostar, 20. 02. 2017.

**SVIM UNIVERZITETIMA/SVEUČILIŠTU  
SVIM NAUČNIM/ZNANSTVENIM USTANOVAMA  
NA PODRUČJU BOSNE I HERCEGOVINE**

**Predmet: Obavještenje o organizaciji naučnog savjetovanja „Naučna misao u Bosni i Hercegovini-historijski razvoj do kraja XX stoljeća“**

Poštovani,

obavještavamo Vas da Federalno ministarstvo obrazovanja i nauke u saradnji sa Fakultetom humanističkih nauka Univerziteta „Džemal Bijedić“ u Mostaru organizira naučno savjetovanje posvećeno historijskom razvoju naučne misli u Bosni i Hercegovini do kraja XX stoljeća. Savjetovanje predstavlja jednu od prethodnih aktivnosti na realizaciji kapitalnog istraživačkog i izdavačkog projekta „Leksikon nauke u Bosni i Hercegovini“.

Razvoj naučne misli pratio je opća kretanja i društveno-političke mijene na prostoru Bosne i Hercegovine. Za period srednjovjekovne Bosne postoje tek nejasne i još uvijek nedovoljno istražene naznake o postojanju institucija i pojedinaca koji su se bavili obrazovnim i naučnim radom. U osmansko doba dominirale su društveno-humanističke discipline, poput književnosti, historije, teologije, sociologije, prava. Austrougarsko razdoblje donijelo je novi kvalitet u razvoju nauke, posebno sa aspekta izdavanja listova i otvaranja modernih obrazovnih, kulturnih i naučnih ustanova zapadnoevropskog tipa, od kojih po svojoj kompleksnosti i značaju posebno treba izdvojiti Zemaljski muzej u Sarajevu. Period između dva svjetska rata nije ostavio značajnije tragove u razvoju nauke. Nakon Drugog svjetskog rata desile su se krupne promjene, posebno u pogledu institucionalizacije nauke. Osnovan je Univerzitet u Sarajevu, razni instituti, zavodi i na koncu Akademija nauka i umjetnosti Bosne i Hercegovine. Sedamdesetih godina XX stoljeća osnovani su univerziteti u Banja Luci (1975), Tuzli (1976) i Mostaru (1977), čime je zaokružen sistem institucionalizovanog naučnog djelovanja u našoj zemlji. Nakon rata (1992-1995), u kojem su naučni kapaciteti izgrađeni u ranijem periodu u velikoj mjeri devastirani, bosanskohercegovačka nauka se ponovo razvija u duhu savremenih evropskih i svjetskih naučnih tokova.

Naučno savjetovanje će se održati u Konjicu 19. maja 2017. godine. Rok za prijavu i dostavu sažetaka (na B/H/S i engleskom jeziku) sa okvirnim pregledom korištenih izvora i literature je 20. mart 2017. godine.

Prijavni obrazac za učešće na Savjetovanju i upute autorima su objavljeni na službenoj internet stranici Ministarstva: [www.fmon.gov.ba](http://www.fmon.gov.ba). Organizator snosi troškove putovanja i boravka učesnika koji dolaze izvan Konjica (za one učesnike čije je mjesto prebivališta udaljeno više od 80 kilometara od mjesta održavanja Savjetovanja), te troškove autorskih honorara za radove koji budu prihvaćeni za izlaganje i objavljivanje.

Koristimo priliku zamoliti Vas da ovo obavještenje učinite dostupnim svim potencijalno zainteresiranim učesnicima, te ih animirate za učešće na naučnom savjetovanju.

S poštovanjem,



MINISTRICA  
*Elvira Dilberović*  
prof. dr. Elvira Dilberović